

Date – 14/04/2025

Time - 18:30 -18:40Hrs

REGIONAL NEWS BULLETIN

HEADLINES (EVENING)

- 1. Fire Service Week pualin Fire & Emergency Services chuan vawiin khan kangmei thelh avanga nunna chan ta te hriatrengna hun an hmang.**
- 2. Zangnadawmna pek phutin Bairabi Land Owners Association in NH-154 Kawngpui laihzauh hna thawktu te hnathawk thei lovin an dang.**
- 3. Ram Danpui duangtu pui ber, Dr BR Ambedkar-a pianchampha vawi 134-na pualin ramchhung hmun hrang hrangah hun hman a ni.**
- 4. Union Home Minister Amit Shah-a'n Modi-a sorkarin zahngaihna tel lovin ruihhloa sumdawna zung a suat chho mek a ni, a ti.**

<><><>

FIRE SERVICE WEEK

Tukin khan Fire Service Week pualin Fire & Emergency Services Headquarters, Aizawl Hunthar Vengah hun hman a ni a, kangmei thelh avanga nunna chan ta te hriatrengna hun hman a ni bawk.

Vawiin bik hi Fire Service Day leh Martyrs Day puala hun hman anih angin Mizoram hmun hrang hranga Fire Station te chuan hemi pual hian hun an hmang a, Martar te sunna hunah hian kangthelhnaa leh duty kaihhnawihna thi te sun nan hun hman niin Martar te thlanah pangpar dah a ni bawk.

Kum tinin Fire Service Week hi ram pumah April ni 14 atanga April ni 20 chhungin hman thin a ni a, Kumin atana thupui chu Kangmei lakah kan ram a him nan, i tangrual ang u" tih a ni. Fire Service Week pual hian Fire Station tin ten Hospital/Nursing Home pakhat leh School pakhat zel kangmei chhuah thulh a a him leh him loh endik na neih a ni dawn a, Fire Station zawng zawng ten an huamchin hnai vaiah Sikul thlan bik neiin Fire Safety Lecture & Mock Drill chu Sikul thuneitute nen inbe rawnin an buatsaih dawn a ni.

Kumin hian Ministry of Home Affairs hnuaia Director General- Fire Service, Civil Defence & Home Guard chuan Mizoram Fire & Emergency Service a thawk mi 5 (panga) te chu an hnathawh that avangin Bronze Disc leh Commendation Certificate dawng turin a thlang a, Leading Firefighter J. Zoliana, Siaha Fire Station ami leh Firefighter H Lalthlamuana, Vairengte Fire Station ami leh Firefighter S. Lalremruata, Fire & Emergency Headquarters ami leh Firefighter L. David Vungzaliana, Khatla Fire Station ami bakah

Driver Special Grade Thangchhuana, Kolasib Fire Station ami te chu lawmman dawng tura thlan an ni.

Champhai Fire Station te chuan Fire Service Day/Martyrs' Day an hmang bawk a. Kum 2024 chhunga kangthelhnaa nunna chan kangthelh pawl mi 20 te sunna hun an hmang a ni.

Nikum April thla atanga kumin March ni 31 chhung khan Champhai Fire Station hian Fire call vawi 19 dawngin - in,thlâm kângah leh electrical fire-ah vawi 4; dâi hnai kang- chenna in tana hlauhawmah vawi 15 an tlan chhuak a ni. He mi hun chhunga bungraw kang ral hlut zawng hi cheng vaibelchhe 1 leh nuai 63 a ni. Kumin January atanga vawiin thleng hian dâi hnai kâng, chenna in tana hlauhawm tak takah vawi 15 lai Champhai Fire Station-te hi an tlan chhuak tawh bawk a ni.

<><><>

LUNGLEI WATER SCARCITY

Lunglei khawpuia tui vang chuan zuallam a pan zel a, PHE Department hotute chuan Tlawng lui tui nghah khawl a ngaih avangin mipuite hriatthiamna an ngen tih an sawi.

Lunglei tui lakna Pialthleng atanga Tui pump in mipui mamawh a phuhruk loh avangin PHE Department chuan Truck Owner Association (TOA) nen ruahmanna siamin Motor lian 10 hmangin veng thlan bik leh tui harsat zual naah tuisem hna an kalpui mek a, Chhungkaw khatah Bucket 6 zel a sem niin ruahman lawk ang chuan Motora tuisem hi ni 18 thleng kalpui a ni dawn a ni.

Nimin khan Trip 13 sem in chhungkua 806 an pe a, Inrinni khan chhungkaw 900 hnenah Trip 14 semin vawiin pawh hian Trip 14 vel sem leh tur a ngaih a ni. PHE leh TOA ten an sem bakah hian Local Council ten an ward ah te semin mimal thahnemngai ten mahni insengso a tuisem an awm deuh reng bawk.

Lunglei tui lakna hi tun dinhmunah Dâr-kâr 10 bawr vel tui pump theih a ni a, Tlawng lui tui nghah khawl a ngaih avangin tui sem a khât tawh hle a, PHE Department hotute chuan mipuite hriatthiamna an ngên tih an sawi.

Lungleia tui harsat avang hian Motor hmanga tui chawi turin a remchang apiangah pump chhawn a ni a, hetihlai hian insu, inbual leh Motor sil an lo awm thin avangin PHE Department chuan Tuichawi Li an tih mai, Mat luiah duty insiam in tui ti bawlhhlawh lo turin ngenna an siam a, PHE Lunglei a thawk te chuan mipui te mamawh phuhru turin an theihtawp an chhuah zel a, hetihlai hian an dan pangngaiin tui connection nei hnenah rualkhai takin sem hna an kalpui ve reng a, nimin Pathianni khan Vertical Turbine(VT) pump chhunga chirhnawi leh bawlhhlawh lut te staff thenkhat ten an thianfai bawk a ni.

<><><>

NH-154

NH-154 Kawngpui laihzauh hna thawktu NIDHI Construction chu Bairabi Land Owners Association chuan tukin atang khan hnathawk thei lovin an dang.

Contractor NIDHI Construction hian hna an thawk chho zel a, tunah hian hna hi za a sawm riat chuang an thawkzo tawh a, amaherawhchu Kawngpui in a pal tlang chhunga ram neitu mi 34 te chu zangnadawmna pek anla nilo a, hei vang hian lungawilovin hnathawh mek hi an dang a ni.

Kan corr report lo ngaithla ang.

He Kawngpui NH-154 hi Hailakandi District, Assam atanga lo chho in Bairabi - Bilkhawthlir ah a chhuak a. A siam hna hi kum 2006-2007 atanga bul tan tawh a ni a, he Kawngpui in paltlanga ram neitute hi Zangnadawmna pek tura tihfel ni tawh mahse, tun thlenga Compensation la pek loh mi thahnem tak an la awm ani. Kum 2024 a he kawng Mizoram sorkarin a chhunzawm leh dawn khan ram neitute hian Kolasib DC hnenah an harsatna tawh thlen in, Compensation pek an la nih loh dante an hrilh a. DC chuan enfiah nawn turin 2024 kumtir khan ruahmanna a siam angin Revenue Department aiawh, PWD (NH Division-III) aiawh leh Bairabi SDO (Civil) aiawh te chuan an enfiah nawn leh a, hemi tum hian ram neitu mi 34 te chu Compensation pek tura ruahman a ni.

Kan corr sawi danin, Bairabi Land Owners Association chuan contractor ten hna an thawh zawh hma ngei in Zangnadawmna hi pe turin Zangnadawmna la dawng velo te chuan thuneitute an ngen nawn leh a, Sorkar atangin thuchiang leh rintlak an hriat hma chuan Contractor hnathawk tur hi dan nise ti a an rel angin vawiin atang hian hnathawktute awmna Camp kawtah kalkhawmin an chhuak tur an dang ta a ni.

<><><>

ZPM

ZPM Thalai hruaitute chuan tun hnaia Ruihhlo kaihhnawiha man Henry Lalbiakzinga Chhungdeng leh ZPM Minister leh Party hruaitute inzawmna nei anga an sawi chu thubelhchian dawl lo a nih thu sawiin thu diklo theh darhtu chungah FIR thehluh an tum thu an sawi.

Vawiina Aizawl Press Club-a thuthar lakhawmtute an kawmna ah he thu hi sawiin ZPM Thalai Vice President Pu Rokhuma chuan thubelhchian dawl lo thehdarhtute chu a tawp thlenga dan hmanga umzui an tum thu a sawi a, Ram hlui zia politics changchawitute'n thlalak hlui hrang hrang zawng khawm a, zeldin thubawla mipui rilru hruai kawi thei turin social media-ah thu an vawrh darh an ti a, ZPM Thalai chuan an ngai thutak hle tih sawiin ruihhlo tawlhthu hnen atanga ZPM-in pawisa an dawng anga inpuhna phei chu ngawih bopui chi-ah an ngai lo a ti.

Pu Rokhuma chuan dawt thu hmanga Minister-te leh ZPM Party beihna chu intihhmingchhiat tumna ngeia an ngaih vangin FIR thehluh nghal an tum tih a sawi a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Naktuk zing dar 7 leh a chanve-ah Chanchinthar puan leh a ni ang.

<><><>

AMBEDKAR’S BIRTH ANNIVERSARY

Ram Danpui duangtu pui ber, Dr. BR Ambedkar-a pianchampha vawi 134-na vawiin khan ram pumah amah hriatrengna hun hman a ni a, he ni pual hian hmun hrang hrangah inkhawm buatsaih a ni.

President Droupadi Murmu, Vice President Jagdeep Dhankhar, Prime Minister Narendra Modi, Lok Sabha Speaker Om Birla, Rajya Sabha Dy. Chairman Harivansh, Rajya Sabha House Leader J P Nadda, Rajya Sabha eptu leader Mallikarjun Kharge, Lok Sabha eptu leader Rahul Gandhi, Union Minister-te leh MP-te bakah mi chi hrang hrangin Parliament House-a Dr. BR Ambedkar-a limah hriatrengna pangpar dahin zahna chibai an hlan a ni.

Dr. Bhimrao Ambedkar-a hi economist leh politician ropui, ram mipuite tana a hun pum hlantu a ni a, hnam hnuaihning zawkte chawikanna tur leh chi inthliarna tibo tura hmalatu niin India-in zalenna a chan hnua Law & Justice Minister hmasa ber a ni a, a thi hnu, kum 1990-ah khan India ram civil mite chawimawina sang ber, Bharat Ratna hlan a ni.

<><><>

AMIT SHAH

Union Home Minister Amit Shah chuan Modi-a sorkarin zahngaihna tel lovin ruihhloa sumdawnna zung a suat chho mek a ni, a ti. He thu hi social media-a tarlangin tuipuia ramdang nena inrina hrulah agency-ten cheng vbch 1800 hu ruihhlo Kg 300 an man, a ti a, he beihpui hi sorkarin ruihhlo tih rem a tum tak takzia tarlangtu a nih thu leh ruihhlo laka fihlim ram din tura hlawhtlinna ropui tak a ni, a ti a, ruihhlo mantu, Gujarat Police leh Indian Coast Guard-te lawmpuina a hlan bawk.

Indian Coast Guard (ICG) leh Gujarat Anti-Terrorism Squad tangdunin nizan khan cheng vbch 1800 hu Methamphetamine Kg 300 chuang an man a. An thudawn bawhzuiin Coast Guard-te hian tuipuia ramdang nena inrina bulah lawng pakhat an lo ti ding a, lawng chhunga awmte chuan ruihhote chu tuipuiah paihin an tlanche zui a, an thil paih hi ICG team-ten an chhar leh a ni.

<><><>